




MÜNCHWILER FASNACHTSCHÄTTÄRE



SCHNITZELBÄNK 2024



S'letscht Johr a - de Dorffasnacht
dört het's Lüt gha - dass es kracht.
Wäg de Einhorn Dancer - sind viel Fremdi cho
händ uf nüt und niemmer - Rücksicht gno.
Zwöi chlopfet sich - und gänd kei Rueh
de Chindsgi isch im Fall - näbezue!

En Infoveranstaltung - die het's geh!
Au anere Umfrop - hesch chöne teilneh!
S'Schlagwort isch - «Gmeindefusion»!
I jedem Ort - git's e Diskussion.
Begeisterig isch chlii - in Sissle und Stei,
drum heisst's für alli - leider NEI!

I de Alte Räbestross - isch fertig boue
Platz hesch überall - zum Versoue.
Doch mit em Luxusschlitte - isch s' nid so geil,
will d'Garage-fahrt - isch äng und steil.
Me het d'Stross verbreiteret - und d'Muur abgrisse,
mit somene Architekt - do bisch scho bschisse!

A de Grillstell isch - Ortsbürgergmei
s'isch luschtig viel - gönd lang ned hei!
Öpper wo - ganz lang isch gsässe,
het d'Gmei am Friitig - total vergässe!
De wo's betrifft - chönte alli känne,
drum Willi jo do - kei Name nänne!

S'isch Pöstlieröffnig - fascht alli sind froh.
Nur gwüssi Nachbere - gsänd's nid e so.
Statt eis go trinke - d'Polizei alarmiere
und wäge Ruhestörig - reklamiere.
Wenn dir spöter hei gönd - haltet d'Gelle,
suscht hetzt me euch au - d'Polizei uf d'Pelle!

Klein und fein - z Münchwile dehei
das isch s'Motto - vo eusere Gmei.
Was das Johr - im Dorf isch gange
isch i eusne Chöpf - bliibe hange.
Händ drus en Schnitzel - bank kreiert
hüt Obe wird si - präsentiert.


Wägemene falsch - parkierte Chare
Cha de Güselwage nüm - i d'Hofmatt fahre!
D'Gmei het die Betroffene - druf informiert,
de Abfall wird nüm - im Quartier deponiert!
D'Verantwortig händ's - a die Betroffene gschobe,
Statt sälber s'Problem - a de Wurze behobe!

Will es Auto isch - entgegen cho
isch s'Andere im Steile - bliibe stoh.
S'Hang afahre - het nid funktioniert,
s'rollt retour abe - grad wie gschmiert,
quer über de Rase - s'isch nid gloge,
dur's Fänster dur - grad i d'Stobe.

Immer wieder - vor em Chindergarte
gseht me d'Auto - wäg de Goofe warte.
Mit em Eltere Taxi - wärde die Chinder gfahre,
hoffentlich tüend's nid - die wo laufe überchare.
Statt Verkehrslotse - für d'Schüler engagiere,
mue me für d'Eltere - Verkehrsdienst organisiere!

Strommangellag - die isch verbii!
S' isch alles ned - so tragisch gsi.
Uf jedes Dach - me hets kapiert,
wird e PV-Aalag - druf montiert.
So hämmer denn - bis zum Schluss
vielleicht sogar - Stromüberschuss!

Es ganzes Johr - hämer en Lade gha,
z'churz dass me sich - dragwöhne cha.
Chum umegluegt - scho isch's passiert!
De «Dorflade» het me - abtransportiert,
Chasch nüm eifach - zu de AVEC-Box laufe,
Getränk und Chips - muesch wieder uf Vorrot chaufe!



Im Oktober tuet - im Fricktal.info
d'lladig für d'Gmei - Versammlig stoh.
De Ufruef für d'Advänts - fänster z'mache,
s'stoht alles unter Sissle - s'isch nid zum lache.
Händ mir jetzt doch - mit Sissle fussioniert?
Nei, im Mobus - isch en Fehler passiert!

A de Gmeiversammlig - het öpper reklamiert,
wills mit em Bushüüsli im Dorf - ned pressiert.
De Bach isch z'nöch - und d Chrüzig au!
Drumm stönd im Räge - Ma, Chind und Frau.
Sött doch gliich - en Lösig geh,
wenn s'z'Aarau würde - d'Finger use neh!

De Brunner de - het öis verloht
einvernehmlich - het er müesse go.
Bis hüt wird gschwiege - Tote Still!
Will niemert de Grund - use rucke will!
Nur mir sind trurig - scho es biz!
Wer lieferet öis jetzt - de nägsti Witz?

Immer wieder - im Schuelhus obe,
tüend sich gwüssni - Lüt ustobe.
Igrizti Hoggechrüz - und Schmierereie,
verursache Chöschte - s'isch zum schreie!
Überwache mit - ere Kamera
Het die Idee - no niemert gha?


Adväntsfänchter het's - letscht Johr geh.
Mit Glühwy, Chueche, - Punsch und Tee.
Au de Amme het sich - das öpis lo choschte,
isch go ässe - und Trinke poste.
Für s'Füür het är brocht - das isch de Hit,
vom JUMBO es Chistli - Schittli mit!

Jetzt hämmer e Neue - de isch guet!
Will er flissig - schaffe tuet!
De Lindeplatz het er - vom Laub befreit
und alles in Container - vom Meili gheit.
Mit em Grüenguet isch er - uf Stei zum Buur,
het gleit mit de Blätter - dur s'Dorf e Spuur.

Per Zuefall hämmers - müesse verneh,
s'OK-Dorffasnacht - tuet's nümme geh!
Statt die ganzi Bevölkerung - z'informiere,
tuet mer s nur uf Facebook - publiziere!
Mer gönd devo us - mer het niemer gfunde,
will d' Dorffasnacht - isch lutlos verschwunde!

Jetzt tüend si Holze - im Bustel hinde,
mit Tyrolienne - und Seilwinde.
Mir hätte no - e super Idee!
Spannet bis is Dorf - es Seili meh!
Es paar Stämm für de Bruno - direkt ab Wald!
Will s'nächst Adväntsfenster - chunt scho bald!

S'blibt im Chaschte - s'Fasnachtschleid!
Die arme Chind - si tüend öis leid.
Kei Fasnacht mache - es isch zum Brüe!
Kei Frauefütz zünde - und Konfetti rüehre!
Hoffentlich tuet's glii - e neu's OK geh,
wo de Alass für s'nächst Joohr - tuet überneh!



En Uswärtige

Z'Stei muess d Spilgruppe - es Gitter ha
damit me d'Spielsache - nid chlaue cha!
Doch Spielgrät sind furt - de Verschlag isch z'chli!
drum riist mer en ab - bout en neue hi!
Wenn d'Stürgälder - wetsch versoue
muesch eifach de Steiner - Bouchef lo boue!

En Alte und immer wieder Aktuelle...

Alle Jahre wieder - kommt die Silvesternacht
Auf Münchwilen nieder – es chlöpft und tätscht und kracht!

De Värs vo letschtjahr - isch für d'Chatz
über d'Souerei - uf em Schuelhusplatz!
Wenn 's'Führwärch scho - so viel tuet choschte,
läng't's halt nüm - zum Sack und Marke poschte!
Au damol händ's - de Abfall ligge loo,
de Abwart putzt – und d'Gmei zahlt scho!

En Aktuelle

Z'Münchwile set's – händ ihr's scho gseh
En Herdmännlipfad – um's Dorf ume geh.
Wenn ihr alli – gönd go stimme
Lot s'AEW – en Batze schpringe.
Damit die Sach – guet tuet grote
Ned vergässe – Vote, Vote!

Gestert simmer - im Pöstli gsi,
doch das isch hüt - scho verbi.
Aber was mer über die Beiz - ghöre tuet,
isch leider mängisch - nid so guet!
Es isch halt scho - e chli zum HÜüle,
dass sich d'Verein - nid willkomme fühle!

Das mir hüt Obe – händ dörfe cho,
Do drüber sind mir – Tschättäre froh!
Im Hübelstübli – isch's halt guet,
will mer do alli glich - behandle tuet!
S' spielt kei Rolle – wer oder was du bisch,
will jede do – willkomme isch!

Schluss

Mir sind z'war grad - so richtig im Schuss
Trotzdem chöme mer - jetzt zum Schluss
Die Glägeheit wämmer - no benütze
und danke dene - wo öis unterstütze
Dänket dra - euis z'informiere
Wenn im Dorf – en Seich tuet passiere!

